

Date – 07/01/2025

Time - 18:30 -18:40Hrs

REGIONAL NEWS BULLETIN

HEADLINES (EVENING)

- Agriculture Minister Pu PC Vanlalruata'n thla thar February ni 20 atangin sorkarin sawhthing a lei tan dawn a ti.
- Union Minister of State for Tribal Affairs Durgadus Uikey an zan hnih cham turin Mizoram a rawn tlawh a, Chief Minister Pu Lalduhoma nen an inkawm nghal.
- February ni 5 ah Delhi Assembly inthlan neih a ni dawn.
- Nepal leh Tibet ramri-a lirnging avangin mi 53 an thi a, mi 62 in hliam an tuar.

<><><>

AGRI MINISTER

Agriculture Minister Pu PC Vanlalruata'n thla thar February ni 20 atangin sorkarin sawhthing a lei tan dawn a ti.

Vawiina a pisaa chanchinbumite a kawmnaah Minister chuan sorkarin Agricultural Market Assurance Schemes hnuaia sorkarin rate tur a tihchhuah tawh angin sawhthing chu kg-ah cheng 50 a lei a ni dawn a ti a. Mizoram puma khaw hrang hrangah society 675 a awm tawh thu sawiin heng society te hian district hrang hranga sorkarin a ruahman sawhthing lakhawma leina tur, secondary collection centre 54-ah an phurhkhawm dawn tih sawiin District tina District Agriculture Marketing Committee in an lo buaipui dawn a ti bawk.

Minister chuan sawhthing chu India ram hmun hrang hrangah an thar nasat thu sawiin a bik takin India ram chhim lamah an thar nasat thu a sawi a. Tun dinhmunah India ram puma

sawhthing rate a la san loh thu sawiin kg-ah cheng 20 atanga 25 vel a ni a ti a. Sawhthing lei tur, buyer hrang hrang ten Mizoram lam la hawi hman loin India ram hmun dangah sawhthing an la lei mek thu sawiin India ram hmun thenkhatah cho mek an la awm a ti a, rate mumal tak siam ala nilo tih a sawi.

Mizoram Agriculture Marketing Board Chairman ni bawk Pu PC Vanlalruata chuan Sorkarin kuthnathawktute chu sawhthing an lei tan hun tura ruahman, thla thar ni 20 chu nghak hram turin an ngen a ti a, thlai dangah pawh hmalak mek a nih thu sawiin Buhhum thar a tam theih nan hma an la a ti a, kumhlui December ni 17 atangin Pangbalkawnah buhhum kg-ah cheng 30 a lei tan a nih thu sawiin Hmarcha kg-ah cheng 350 aia to in hralh mek a ni a ti a. Hmunphiah hralhna tur pawh tihfel a nih thu sawiin panel buyer mi 7 thlan an nih thu leh inremna siamin a chingtuten an hmunphiah an keh tan thu leh March atangin a leitute hnenah hralh tan a nih dawn thu a sawi bawk.

<><><>

CM

Chief Minister Pu Lalduhoma kaihhruaiin State Level SASCI Committee chu CM Conference Hall-ah an thukhawm a, SASCI hmanga hnathawh mek leh thawh tur thlan fel tawh te an thlirho.

Pu Lalduhoma chuan, sawrkar hian a thiltih tinrengah moral reforms a ngaihtuah thleng phak zel a, hna chhia te, sawrkar hnathawk inthlahdah lutuk te an remti lo a ti a. SASCI leh fund danga thawh tur thlan leh kutthlak ve tawh chin chu a tha tur a ni a. A huna zawh ngei pawh tum tlat tur a ni a ti.

Loh theih lohva hnathawh ennawn ngai emaw hna zawh hun tur pawhsei a lo ngai a nih pawhin Project Monitoring Committee ten an endik hmasa zel ang tih Chief Minister chuan a sawi a, hmasawna hnathawhte a tir atangin Monitoring Committee chuan a vil zel dawn a, a mawhphurtute an tan tlan hle a ngai dawn a ni, a ti a. Sawrkar hmalakna tinrengah sawrkar hnathawkten an thawhpui that avangin lawmthu a sawi.

Mizoram sawrkar chuan hmasawna ruhrel siam nan SASCI 2024-25 Part 1 atangin cheng vbc 275 sengin a thawk dawn a ni.

<><><>

UNION MOS VISIT

Sawrkar laipua Union Minister of State for Tribal Affairs Durgadus Uikey chuan vawiin khan zan hnih cham turin Mizoram a rawn tlawh a, hmasawna hnathawh hrang hrang a enpui ang.

Vawiin tlai vek khan Chief Minister Pu Lalduhoma chuan a office-ah Pu Uikey hi a kawm a, Ministry of Tribal Affairs kal tlanga Mizorama hnathawhte an sawi dun a ni.

Chief Minister hian Mizoram a rawn tlawh avangin Pu Durgadas Uikey hi lawmthu a lo hrilh a. Mizo mipuite chu tribal vek an nih avangin Mizote Minister a ni, tiin a lo lawm a ni.

Pu Durgadas Uikey pawhin Mizoram tan a inhawng hle tih a a sawi a. Inpawh takin Tribal Affairs kal tlanga hmalaknate leh nasa zawka hmalak zel dan tur te an sawi dun.

Union Minister hian naktukah Mamit District panin hetah hian DC Conference Hall ah sawrkar mi pawimawh hrang hrang a kawm dawn a, Mamit ah hian zan khat riak tura ruahman niin a cham chung hian hmasawna hnathawh hrang hrang a tlawh dawn bakah BJP party mi te nen an inkawm dawn a ni.

<><><>

TOURISM DEPT

Minister of State Pu B. Lalchhanzovan vawiin khan Lawngtlai District-a India leh Myanmar inrina Zorinpui a tlawh a, ramri kal tlanga insumdawn tawna turte a enfiah.

Minister chuan, India leh Myanmar inkalpawhna kawngpui KMMTTP road chu kawng pawimawh tak a nih chhoh zel tur thu a sawi a. Zorinpui chu ram pahnihte insumdawn tawna hmun pui tur a la nih thuai a rin thu sawi bawkin, a chhehvela cheng mipuite chu a hlawkna tel thei tura lo inbuatsaih lawk turin a chah.

Pu B. Lalchhanzova hi Lawngtlai East MLA Dr. Lorrain Lalpekliana Chinzah Adviser to Chief Minister, Pu K. Hre Kung MDC & Leader of Opposition LADC leh a thawhpuite bakah, official mi thenkhatte leh ZPM Lai District Headquarters Lawngtlai hruaitute'n an tawiawm a ni.

Supply Minister hian tukin khan Lawngtlai Council Venga FCI Godown tlawhin Godown dinhmun leh hnathawh dante a enfiah a.

Supply Minister hi FCI Godown a thawktute'n lo dawngsawngin, godown dinhmun tlangpuite leh hmalak dan hrang hrangte Minister hnenah hian an lo hrilhfiah a. Buhfai chhekkhawl an ngah thu leh, a hun takah buhfai an hmuh thin thu an sawi a. Lawngtlai District mipuite tan tun dinhmunah buhfai lama harsatna a awm loh thu Minister hi an hrilh.

Supply Minister chuan, FCI Godown a thawktute chu mipui rawngbawltu an nih thu leh, an hnathawh chu mi zawng zawng huap hna pawimawh tak a nih avangin taima tak leh rinawm taka thawk turin a chah a, an thawhrimna leh inpekna ah chhuanawm a tih thu a sawi bawh a ni.

<><><>

HMPV

Tunhnaia hri leng mek, Human Metapneumovirus (HMPV) laka inven dan Health Minister chairman-na hnuaiah a viltu tur 'Core Committee on HMPV' din a ni.

He hri leng chungchangah hian nimin khan Health Minister Pi Lalrinpuii hovin Core Committee on HMPV thutkhawm niin State level leh District tinah Rapid Response Team siam a ni a. Henga thawktute leh mipuite hriat tur pawh rel niin tun tum China a hrileng HMPV chu tlang hrileng chi khat, kum danga leng thin ang tho a ni an ti a. Tunah hian Karnataka state-ah naute thla thum mi leh thla riat mi ah hmuhchhuah niin an dinhmun ngaihtuahawm a ni lo a, dam lam pan zelin pakhat chu damdawiin atanga chhuah tawh a ni tih tarlan a ni.

Thutkhawma tarlan danin he natna hrik hi China chauh ni lo, khawvel pumah kum tin a leng a, kumtluan a leng a ni a, hritlang satliah angin a langchhuak thin a. Health Department chuan IDSP kaltlangin he natna hi uluk takin a vil reng tih sawiin tun hnaiah Influenza like illness leh Severe Acute Respiratory Illness case tam thar thut report a awm lo tih an tarlang a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar hi puan leh a ni ang.

<><><>

DELHI ELECTION

February ni 5 ah Delhi Assembly inthlan neih a ni dawn a. Vawiin khan Election Commission chuan Assembly seat 70 awmna Delhi Assembly inthlan hun tur hi a puang a. Vote tla te hi February ni 8 ah chhiar a ni ang. Chief Election Commissioner Rajiv Kumar-a chuan vawiin khan Delhi inthlan hun hi puangin inthlan hriattirna hi tun thla January ni 11 ah tihchhuah a ni dawn a ti a. Inthlan chuh tumte tan tun thla ni 17 thleng hming thehluh theih a ni a. Polling station sing khat sang 3 leh 33 siam a ni dawn a. Tun tum inthlanah hian voter nuai 155 chuang an awm a ni.

Chief Election Commissioner chuan inthlanah hian Delhi mipuite vote thlak theuh turin a sawm a. EVM khawl tihdanglama puhna chu hnawlin EVM khawlte a him tawk tih a sawi a. India rama inthlan dan chu khawvel huap pawha a tha ber pawl a ni a ti.

Tuna Delhi sawrkar kal lai mek hi thlaleh ni 23 ah a tawp dawn a. Kum 2020 inthlanah khan AAP te chuan seat 62 la in BJP ten seat 8 an la a ni.

<><><>

NEPAL EARTHQUAKE

Nepal leh Tibet ramri-a lirnghing avangin mi 53 an thi a, mi 62 in hliam an tuar. Tukin khan Nepal ah hian magnitude 7.1 a nain lir a nging a. Lirnghing intanna Epicentre hi Tibet ramchhung Xizang hmunah a ni a. He lirnghing hi India hmar lamah pawh hriat ve a ni a. Bihar, West Bengal leh Sikkim-ah te lirnghing hi an hre pha a ni. Bihar hmun thenkhatah chuan lirnghing hi a na ve hle a, mipuiten an in an tlanhhuahsan hial a ni.

<><><>